

pserunt; quotquot vero consentire recusarunt, in ultimos orbis fines relegati sunt. VINCENTIUS LIRINENSIS demum Commonit. n. 4. cunctos prope latini sermonis Episcopos partim vi, partim fraudibus deceptos; quin universum Romanum imperium funditus concussum et emotum tum fuisse asserit; ergo.

R. N. Cons. Nam 1^o. S. GREG. hac sententia non involvit Episcopos Occidentis, tempore persecutionis illius, quam ibidem refert, in fide semper immotis; sed, ut consideranti textum patet, de iis solum loquitur, quae post habitam anno 360. Constantinopoli 50. Episcoporum Arianorum pseudosynodum in Oriente gesta sunt. Quia S. Doctor ibidem aperte declarat, se loqui de decem provinciis Asiae, quas Georgius Cappadox Arianus, intrusus in Alexandrinam sedem, dire vexabat, fultus et abusus auctoritate Cæsariorum. *Egyptum*, inquit paulo ante, *incursionibus vastat... Syriam populatur: Orientis quantum potest arripit*, etc. Hujus potentie Concilium illud fuit, quod Seleucia primum, deinde in hac amplissima civitate (Constantinopolitana) coactum est. Quod expressius tradit S. HILAR. L. de Synod. n. 63. Absque Episcopo Eleusio et paucis cum eo, ex majori parte Asianæ decem provinciæ, intra quas consisto, vere Deum nesciunt. Hinc nequidem eo tempore maxime Episcoporum Orientalium pars a fide divulsa fuit; et S. Doctoris verba, *si per paucos exceperis*, ELEUSIUM spectant, et quosdam alios Episcopos illarum decem duntaxat provinciarum Asiae.

2^o. THEODORETUS vero de iis tantum Episcopis Ariminensibus loquitur, quos Nicæam Thraciae deductos ibi refert; quod Valentis formulæ subscribere nollent, quorum aliqui postea metu, aliqui fraude inducti subscrivserunt, ceteris, qui id constanter renuebant, in remotas oras relegatis. Responsio ex initio sequentis capituli 22. ejusdem historici amplius patet, dum formulam ab universis veritatis propugnatoribus, maxime ab Occidentalibus, reprehensam refert, et in fidem continuo subjicit Damasi, aliorumque Occidentalium epistolam ad Episcopos Illyrici.

3^o. VINCENTIUS LIRINENSIS cit. loc. auxesi oratoria rem amplificat, sicut et sepo alias; velut, dum Nestorium ab omnibus Orientis Episcopis primo damnatum asserit: atqui plerorumque scriptorum testimonio, Episcopi, a quibus primò damnatus Nestorius, numero circiter 200. erant, numerus vero Episcoporum in Oriente tum supra 700. stetit. Sic et loc. cit. amplificatione pari describit sacerdotum aliorumque constantiam; ut proinde vel secum ipso pugnare VINCENTIUS dici debeat, vel usus exaggeratione. Vel, si mavis, verba, cunctos prope latini sermonis Episcopos, explica de cunctis Arimini congregatis, non in toto Occidente dispersi, de quibus contrarium constat ex scriptoribus antiquis, qui haec in re majoris sunt ponderis; tum ex resp. antea ad Theodoretum; tum ex Lucifero Calaritano Episcopo apud Sulpitium L. 2. Hist. Sacr., ubi refert Luciferi epistolam ad Constantium Imper., qua exprobrat Ariano principi, quod frustra conatus fuerit Occidentem pervertere. *Tua novella prædicatio et recens religio non solum adhuc limitem Romanorum peragrare non valuit, et utique te satis agente; sed et ubi radices figere tentaverat, aruit, recedentibus scilicet omnibus Dei famulis, atque paucis tuis tecum manentibus.*

Ad 6^{um}. R. N. utrumque, de quo plenius nunc Art. seq.

ARTICULUS IV.

UTRUM LIBERIUS S. P. ALICUJUS REUS PRÆVARICATIONIS FUERIT, SIVE SUBSCRIBENDO CONDEMNATIONI S. ATHANASI, SIVE ULLI ARIANORUM FORMULÆ.

113. Tres distingui debent formulæ Syrmientes, ab Arianis in diversis Syrmii conventibus editæ. Prima anno 381. contra Photinum prodit, et preter symbolum fidei 27. anathematismos continet; eamque S. HILARIUS Lib. de Synod. n. 38. catholicum in sensum flectit, S. ATHANASIUS vero Lib. de Synod. n. 27. illam a formulæ aliis vere Arianis non secernit. Altera anno 357. suos natales habuit, arianam perfidiam aperta fronte ostentans; in ea Filius nec consubstantialis Patri, imo nec *similis* dicitur, etc. ut proin a S. HILARIO dicatur L. de Synod. n. 10. *blasphemia per Osium et Potarium apud Syrmium conscripta*. Tertia anno 359. ortum habuit, ut contra PAGIUM et VALESIUM, qui in annotatis ad Sozomenum L. 4. c. 18. eam anno 358. procusam volunt, constat ex S. ATHANAS. L. de Synod. n. 8. dum editam ibidem dicit, *præsente Domino nostro piissimo et victoriis eximio Imperatore Constantio Augusto, aeterno venerando, sub consulatu Flaviorum Eusebii et Hypatii, Syrmii undecimo calendas Junias*: id est, 22. Maii anni 359. Expungitur quidem in ea vocabulum *substantia*, vel *consubstantialis*, velut a populo ignoratum, et scandala parere natum, eo quod in Scripturis non contineatur; Filius tamē Patri *per omnia similis* dicitur.

114. Reum fuisse LIBERIUM tam subscribendo condemnationi S. ATHANASI, quam alicui ex Syrmiensibus formulæ, communior tenuit sententia, quæ post medium ævum invaluit, quo tempore credi primum cœpit LIBERII lapsus, maxime postquam Faber indigestam quandam MSS. farraginem sub nomine Fragmentorum S. HILARII vulgavit, et post Fabrum Constantius ex eruditis Benedictinis Congr. S. Mauri, inter quæ Epistolæ quatuor sub nomine LIBERII, in quibus fœdissimus illius lapsus non dissimulatur, repente comparuerunt. Adeo alte infixæ hæc sententia ex tunc plerisque fuit, ut nequidem dubitarent, aut amplius inquirerent, num lapsus esset revera LIBERIUS? sed in eo solo magnis contentionibus dissiderent, cui ex tribus Syrmiensibus formulæ subscrississet. Pro prima stat Baronius. Pro secunda Tillemontius Blondellum Calvini sectatorem refert; item Petavium, sed perperam, cum is Annot. in S. Epiph. pag. 316. (edit. Paris. a. 1622.) aperte declaret, se non disputare, utrum alicui formulæ subscriperit, diserteque dicat, esse posse, *ut nequaquam subscriperit; heretici vero comprobata ab illo heresin falso jactauerint*. Pro tertia pugnant Pagius et Valesius. Tillemontius vero ipse, licet eorum ex numero, qui lapsum LIBERII primi propugnarunt, dum Nota 53. in Arianos, inquirit, cui formulæ subscriperit LIBERIUS, statim profitetur libere, ingentem esse illius examinis difficultatem, satiusque manere in dubio, quam pro alterutra parte aliquid decidere. Ut vel ex hoc dissidio quis aestimet, quam parum fidei mereatur LIBERII lapsus.

E contra neque condemnationi S. ATHANASI, neque ulli e tribus formulæ subscrississe LIBERIUM Joannes STILINGUS e Societate Jesu in Dissert. Critico-

Histor. aliquae recentiores nunc contendunt, utque mihi quidem videtur, salvis aliorum judiciis, longe probabilius. Quare

113. Dico. LIBERIUS S. P. neque condemnationi S. Athanasii; neque ulli unquam Arianorum formulæ subscrispsit; neque eorum complexus est communionem: proinde in causa illa contra Arianos nunquam lapsus est LIBERIUS.

Prob. I. in genere. Lapsus ille Liberii, qui pretenditur, 1º. repugnat scriptoribus et historicis partim Liberio coœvis, partim post illum non adeo diu scribentibus. 2º. Non congruit SS. Patribus. Sed 3º. originem traxit ex monumentis suppositiis; ergo.

Prob. Ant. 1º. p. Scriptores illi historiæ Ecclesiastice, et ex quorum testimoniis tota ferme pendet, quam habemus, de Arianismo historia, sunt RUFFINUS, SOCRATES, SOZOMENUS, THEODORETUS, Sulpitius SEVERUS, CASSIODORUS. E quibus

4º. RUFFINUS quidem L. 10. Hist. Eccl. c. 27. de causa reditus Liberii sic loquitur: *Liberius Urbis Roma Episcopus, Constantio vivente, regressus est; sed hoc, utrum quod acqueverit voluntati sue (Constantii) compertum non habeo.* Ex quo Ruffini loco, licet in eo non neget conceptis verbis, Liberium acquevisse; sic tamen saltem arguitur: si Ruffinus, Romæ existens, Liberium nosse potuit, qui certo Fortunatianum Aquileensem Episcopum, cui Liberii lapsus et subscriptio imputatur, ubi studiis operam dedit, cognoverat, certo compertum non habuit, utrum quod acqueverit voluntati Imperatoris ad subscribendum; an vero ob Romanorum preces dimissus sit Liberius; unde igitur compertum habere poterant scriptores illi Neoterici, tam multis posteriores seculis, quæ tanta tradere confidentia cœperunt? Sed quod Ruffinus dubitanter, expressius dant alii. Nam

2º. SOCRATES L. 2. c. 37. *Liberius, inquit, non multo post ab exilio revocatus, sedem Episcopatus propterea recuperavit, quod populus Romanus seditione conflata Felicem Antipapam ejecerat; Imperatorque ipse, etiam invito animo, consenserat.* Ubi dicit 1. quod propterea recuperavit; ergo ob turbas Romanorum, non ob lapsum. 2. Quod Imperator invito animo hoc fecerit: sed si Liberius consensisset Imperatori, condemnando S. Athanasium, vel subscribendo alicui formulæ, non remisisset Liberium invitus; haec enim causa erat relegandi Liberium, ut Imperator sic ex Pontifice extorqueret vi, quod alio modo non poterat.

3º. SOZOMENUS L. 4. c. 15. de Liberio ait: *Nam Liberium, utpote virum undequaque egregium, et qui pro Religiōne Imperatori fortiter restitisset, populus Romanus impense diligebat.* Hæc vero scribit de Liberio postquam Constantius jam decrevisset remittere Liberium, ac jam litteras dedisset ad Romanos. Ergo non tam ante exilium, quam eo durante constans manserat; nec aliter sciverant Romani; vel secus non egregium, nedium undequaque egregium, dicere vel potuisse, vel dixisset. Deinde disertis verbis ait, falsum ab Arianis sparsum fuisse rumorem de lapsu Liberii. *Cum Eudoxius, et qui cum illo opinioni Aetii favebant, Antiochiae Hosii epistolam accepissent, sparsis rumoribus divulgaverunt, Liberium quoque consubstantialis vocabulum condemnasse.* En fabulae de lapsu Liberii originem.

4º. THEODORETUS L. 2. c. 17. postquam populi Romani studium pro revo-

catione Liberii retulisset, præsertim mulierum nobilium, Imperatori expontentium, quod nemo præsente Felice Ecclesiam ingredi auderet, subdit: *Flexus itaque Imperator, egregium illum, omnique laude dignissimum ab exilio redire jussit;* ergo non ob Liberii lapsum flexus. Deinde postquam lecta fuisset epistola Imperatoris in circo, qua Liberium et Felicem simul præesse voluit Ecclesiae; refert, omnes una voce exclamasse: *Unus Deus, unus Christus, unus Episcopus... post has Christianissimæ plebis acclamations, pietate ac justitia plenas, rediit admirandus ille Liberius.* Ergo certe in exilio lapsus non fuerat. Numquid propter lapsum erat *egregius ille, omni laude dignissimus*, imo *admirandus redux* Liberius? Similia hactenus dictis apud Sulpitium Severum, et Cassiodorum reperies.

5º. ROMANI tunc in fide constantissimi summo gaudio et plausu redeuentem exceperunt Liberium, ut hic quasi victor urbem intraverit, velut notat historia; non est igitur verosimile, Romanis innotuisse aliquid de ullo Liberii lapsu: si enim Felicem propterea solum, quod ab Arianis ordinatus, cum his communicaret, licet cætera Nicænæ fidei formulam, teste Socrate et aliis, servaret, adeo sunt aversati, ut nequidem vellent, eo præsente, ingredi Ecclesiam, atque urbe expulerint; quomodo Liberium prævaricatorem, a condemnatione S. Athanasii, subscriptione formulæ, communione cum Arianis maculatum, et tanto studio repetivissent, et tanto plausu recepissent? Non appareat certe, quomodo cum tanto Romanorum gaudio conciliari queat Liberii lapsus. Non invenit etiam Baronius, quomodo illa conciliaret; ideoque contra auctoritatem antiquorum omnium, nullo nixus testimonio, maluit dicere, Liberium invenisse ab alienatos a se Romanorum animos.

6º. In MENÆIS omnibus Græcorum, in quibus Liberii *ut Sancti et Confessoris* annuntiatur memoria, aperte asseritur, operam adhibuisse Constantium, ut Liberium a communione S. Athanasii abstraheret, et ad suam hæresin pertraheret; sed id efficere nunquam potuisse; et proin aperte negant lapsum Liberii; imo nunquam illum Græci crediderunt. Sed solos Latinos scriptores post medium ævum hæc invasit credulitas, orta ex suppositiis quibusdam monumentis.

116. Prob. 2º. p. Nam 1º. S. AMBROSIUS, Romanus origine, qui Romæ studiis operam dederat, Pontificatum gerente Liberio, ut eum optime noverit tam ante, quam post exilium, sanctitatem Liberii summis laudibus celebrat L. 3. de Virginib. c. 1. ubi S. Marcellinæ sorori sue, quæ virginitatis velum a Liberio acceperat, orationem ab eo tunc habitam recitat; item c. 4. post finem hujus orationis. Idem S. BASILIUS fecit eodem fere tempore; epist. 263. n. 3. (al. 75.) ad Occidentales, S. EPIPHAN. hær. 75. aliquie, quotquot de Liberio scripserunt. At non ita Liberii sanctitatem extulissent, si hujus reditum iis credidissent maculatum sceleribus, qualia sibi post medium ævum finxere scriptores Latini, et inter primos Tillemontius; quem, ut fit uno præente, facile securi alii, illius argumentis sua voluerunt scripta exornare. Vel si persuasum habuissent Patres Liberii lapsum, hunc diluere decuisset, et commendare Liberium a poenitentia, quod nullus fecit.

117. Conf. 1. Si de lapsu Liberii constabat aliquid eo tempore, si de hoc



extabant ipsius Libérii epistolæ, quomodo factum dicemus, ut ea de re nulla omnino reperiatur mentio in scriptis vel ullius Patrum partim coævorum, partim secutis post seculis florentium. De lapsu Hosii frequenter et acriter conqueritur S. HILARIUS Lib. de Synod. et contra Constantium Imp., nusquam de Liberio, quamvis lapsum ejus ignorare non posset, si verus esset. Liberum laudibus extollit S. ATHANASIUS, nullibi prævaricationis redarguit; nam quæ de lapsu Liberii in quibusdam ejus operibus leguntur, hæc postmodum addita fuisse ab aliis, aperte videbimus.

Porro scripsit iis temporibus contra Arianos LUCIFER CALARITANUS, adeo ab Arianis abhorrens, ut Ariminensibus Patribus ob suppressum ἐμούσιον, sive vocabulum *consubstantialis*, nunquam reconciliari voluerit; num concoquere potuissent tam pudendum Liberii lapsum, si verus fuisset? Sed tamen de hoc ne verbulo memorat; sed cum Liberio semper communicavit: eo solum nonnihil Liberio subinfensus, quod Ariminenses receperisset in gratiam; quantum indignatus Liberio, si hic ipse tantus, et major Ariminensibus prævaricator fuisset? Scripsit item MARIUS VICTORINUS Afer; scripsit S. PHÆBADIUS, Episcopus Aginensis; sed ambo nihil de lapsu Liberii; sed quid mirum? cum nequidem Semiariani Episcopi, licet vexarentur ab orthodoxis, nunquam ad Liberii scriptionem provocarint. Objecerant S. Phæbadio Ariani lapsum Hosii, ut testatur ipse in Biblioth. PP. Lugdun. Tom. 4. pag. 305., sed nunquam de Liberio aliquid.

At dices: S. HILARIUS Lib. contra Constantium n. 11. Liberii lapsum hisce innuit, dum Imperatorem ita alloquitur: Vertisti deinde usque ad Romanum bellum tuum, eripiusti inde Episcopum: et o te miserum, qui nescio utrum majore impietate relegaveris, quam remiseris. Verum

R. N. A. Hæc enim, utrum majore impietate remiseris, nequaquam lapsum Liberii respiciunt, sicut neque hæc, utrum majore impietate relegaveris, arguunt aliquam culpam Liberii; sed impium Constantii factum tam in relegando, quam remittendo Liberio; magna enim impietate relegaverat, quod, arrogata sibi auctoritate, caput Ecclesiæ eriperet; æque magna impietate remiserat, quod remisisset ita, ut vellet Felicem simul cum Liberio præesse Ecclesiæ, ut num. præc. ex Theodoreto vidimus; utrum vero magis impium, Ecclesiam orbare capite, vel facere Ecclesiam bicipitem?

118. *Conf. 2. Fasti Hieronymiani apud Florentinum; antiquissimus Codex Epternacensis; item Corbeiensis; Martyrologium Augustanum, Labbeanum, et Gellonense; Turonense apud Martennium; Martyrologia alia MSS. ex genere Hieronymianorum; Auctaria Bedæ; Appendix Adonis; plura Usuardi auctaria, et plurima recentiorum Martyrologia cum Galesinio, cuius Martyrologio ante Baronianum usæ est Romana Ecclesia; verbo: Quotquot ab eo tempore extant, Liberii mentionem faciunt; sed ne unum est, quod ejus lapsum referat. At concipi non potest, qui factum sit, ut e tot scriptoribus unus lapsus Liberii perstringeret, si verus fuisset.*

Dices: Silentium scriptorum de aliqua re nihil probat; cum sit argumentum negativum.

R. Evidem silentium hoc non esse semper argumentum convincens, aut quod rem decidat, 1º. quia subin de facto aliquo non erat occasio scribendi: 2º. quia unus, alterve auctor, coævus licet, factum aliquod ignorare potuit:

3º. quia quidlibet attingere non erat scopus scriptoris ejuslibet; nec enim omnes de re qualibet scripsere: 4º. si scriptor coævus partium studio corruptus, vel suspectus fuerit, etc.

Sed propterea male universum hoc argumentum rejicitur. Quin locum habere debet 4º. si concurrat cum argumentis positivis: 2º. si posceret occasio, ut factum referret: 3º. si ignorantia scriptorum presumi non possit: 4º. si de studio partium suspecti dici non possit: 5º. si non pauci duntaxat, sed plurimi numero, et quotquot historiam, ad quam factum pertinet, ex professo tractant, nihil memorent: 6º. et maxime, si, qui contra commune omnium silentium asserit factum aliquod, id non sufficienter probet argumentis positivis, indubuis; cum haec probatio in quovis ordinato judicio incumbat asserenti factum, et delictum, vel si plane innatur suppositiis. Ratio horum est; quia secus, historiarum loco, fabulis demum redundabunt omnia.

Atqui in praesenti controversia, 1º. hoc scriptorum silentium concurrit cum argumentis positivis n. præc.: 2º. poscebat referri hoc Liberii factum scribendi occasio, cum de redditus ejus causa ex professo agerent, quam tamen ejus lapsui tribuit nemo; imo'ne Arianorum quidam illius temporis, si Philostorgium strenuum in paucis Arianum excipias, sed cui statim respondebitur: 3º. communem illam scriptorum ignorantiam et Patrum, in specie S. Hilarii Pictavorum Episcopi, eo tempore viventis, et acerrimi Arianorum hostis, nemo nisi temere presumet: 4º. nec studium partium illis objici potest; qui enim Patrum Ariminensium acta non modo non dissimularunt, sed eos agitarunt etiam; qui reliquorum Pontificum nævos diligenter notarunt, cur, aut cui bono unius Liberii lapsum tacuissent? certe si reprehendendus fuisset a lapsu Liberius; idem commendandus fuisset a penitentia, cum redux ab exilio nihil zeli omiserit contra Arianos: 6º. qui lapsum Liberii posterioribus seculis divulgarunt, neque argumenta afferunt hunc sufficienter probantia, imo nequidem authentica, ut mox dicetur.

119. *Dices: Philostorgius in Epitome L. 4. n. 3. teste Photio, tunc (scilicet cum Constantius Sirmium venisset) etiam eundem Liberium, inquit, et una cum illo Osium Episcopum contra consubstantialis vocabulum, et contra Athanasium subscrapsisse. Postquam vero subscrapsissent, Osium quidem ad sedem suam, Cordubam scilicet Hispania, abiisse; Liberium vero Romanæ Ecclesiæ præfuisse.*

R. Manifestum est, hic a calumniatore pro vera historia referri falsum rumorem, quem sparserant Arianî, cum lapsus esset Hosius, de consensu quoque Liberii in eamdem hæresin. Patet ex eo, quod utrumque simul eodem tempore lapsum, ac simul ad Ecclesiam suam remissum asserat; sed ambo notorie falsa sunt: primum; quia formula, cui subscrapsit Hosius, erat secunda Sirmiensis arianam hæresin aperta fronte præferens; at nemo catholicorum ait, huic subscrapsisse Liberium, quod et infra probabitur: secundum; quia Hosius rediit anno 357. Liberius autem anno 358. omnium consensu scriptorum. Sic et respondere debent ad Philostorgium, qui a nobis dissentiant, et Liberium vel primæ, vel tertiae formulæ subscrapsisse contendunt; ne secus Liberium faciant aperte hæreticum.

120. *Prob. 3^a. p.* Fundamentum, cui tota structura innititur de Liberii lapsu, sunt quatuor epistole sub Liberii vulgatae nomine; quædam loca reperta in operibus S. ATHANASI, et S. HIERONIMI: atqui hæc ut genuina admitti non possunt; ergo. *Min.* sat clare constabit solutione objectionum; uti pariter, fragmenta illa divulgata sub S. HILARII Pictaviensis nomine, quibus inserta erant quatuor illæ epistolæ, et a quibus istæ ob auctoritatem nominis S. Hilarii fidem invenerunt apud multos, S. Præsuli nonnisi ridicule tribui posse.

121. *Prob. II. in specie de formulis singulis Sirmiensibus.*

I. Liberius non subscrispsit formulæ primæ. *Prob. 1^o. negative:* Subscriptio hæc asseritur sine ullo auctore antiquo, sine ulla ratione idonea, sine ulla verisimilitudine; imo contra omnem verisimilitudinem; ergo male asseritur. *Prob. Ant. quoad 1^{um}. membr.* Nam duo textus afferri solent ab adversariis: primus ex epist. Liberii ad Orientales depromptus est; sed hanc epistolam supposititiam esse, ut ante dixi, ex manifestis indiciis in solutione objectionum constabit: alter ex fragm. 6. sic vulgo dictorum fragmentorum S. HILARII petitur; de quo nunc statim dicemus. Reliqua membra ex sequenti probatione positiva elucescent.

Prob. 2^o. positive. Concilium Sirmiense, in quo Photinus damnatus est, conditaque prædicta fidei formula, tam antiqui, quam recentiores historici passim figunt anno 351. cum Petavio, qui illo anno habitum probat in Annotatis ad S. Epiphanius pag. 317.; atqui non est verisimile huic formulæ subscrispsisse Liberium. *Prob. min.* Imprimis cum formula illa conderetur, Liberius nequidem adhucdum erat Romanus Pontifex, sed talis creatus primum fuit anno 352. 23. Maii. Deinde vero a Liberio facto Pontifice ante exilium nunquam exegit Imperator, ut huic formulæ, sed ut condemnationi S. Athanasii subscriberet; propterea enim Liberium, quod condemnare S. Athanasium nollet, cum aliis Episcopis idem renuentibus relegatum fuisse, concors est scriptorum relatio; et constat ex ultimo Liberii cum Imperatore colloquio, quod refert THEODORET. L. 2. c. 13. Cur igitur sollicitatum dicemus Liberium ad subscriendum illi formulæ, anno quidem secundo, vel tertio exilii sui, h. e. anno 357.? quo tempore novas cudebant formulas Ariani, et de priore illa anni 351. non erant amplius solliciti; et minime Imperator. Certe tempus, aliaque acta omnia anno 357. et 358. plus, si supponatur alicui subscrispsisse Liberius, favent secundæ, quam primæ formulæ. Vedit hoc PETAVIUS, ibid. pag. 316., ideoque dixit: *Hoc vero certissimum, neque priori illi contra Photinum editæ subscrispsisse; et si ex tribus Sirmiensibus aliquam admiserit (ex hac hypotheticala locutione male ab aliis pro formula secunda citatur Petavius), non aliam, quam secundam, cui et Osius assensus est, comprobasse.*

Dices: Juxta S. Hilarium Fragm. 6. n. 7. *Perfidiam autem apud Sirmium descriptam, quam dicit Liberius catholicam, a Demophilo sibi expositam, hi sunt, qui conscriperunt: Narcissus, Theodorus, Basilius, Eudoxius, Demophilus, Cecropius, Sylvanus, Ursacius, Valens, Evagrius, Hyrenius, Exuperius, Terentianus, Bassus, Gaudentius, Macedonius, Marthus, Acticus, Julius, Surinus, Simplicius, et Junior... omnes hære-*

tici. Atqui multi saltem ex his certo non fuerunt auctores formulæ secundæ Sirmiensis; ergo primæ.

R. N. Allata verba ex Frag. 6. esse S. HILARII; præterquam enim, quod totam fragmentorum farraginem cum BARONIO et BELLARMINO abnegatur simus S. HILARIO, illa certe ex Fragm. 6. recitata S. Præsuli tribui non possunt.

1^o. Quia vocantur *omnes hæretici*: atqui hoc falsum est, et ipsi repugnat HILARIO; nam inter recensitos Episcopi multi erant Semiariani, ut BASILIUS Ancyranus, quem laudat S. ATHAN. L. de Syn. n. 41., qui habito Concilio secundam Sirmensem formulam damnavit; SILVANUS Tarsensis S. BASILII M. familiaris; DEMOPHILUS, aliquis; illos autem S. HILARIUS nunquam habuit hæreticos, sed summis extulit laudibus, coluit ut fratres, et viros sanctos et apostolicos, L. de Synodis, ubi sic eos alloquitur n. 77. 78.: *Reliquis mihi sermo ad sanctos viros, Orientales Episcopos dirigendus est... et dabunt veniam ex communi conscientie fide secum liberius locuturo.* O studiosi tandem Apostolicæ atque Evangelicæ doctrinæ viri! quos fidei calor in tantis tenebris hæretica noctis accedit! Quantam spem revocandæ verae fidei attulisti, constanter audaciæ perfidiae impetum retundendo. Et infra n. 91. *Homoousion nescio, nec intelligo, nisi tantum absimilis essentia confessione...* Pium est quod volumus, ne damnum Patres, ne animemus hæreticos. Item n. 88. Date veniam, fratres, quam frequenter poposci: Ariani non estis; cur negando homoousion censemini Ariani? En! S. HILARIUS ait 1. Semiarianos in homoousio confiteri id, quod ipse confitetur HILARIUS: 2. se habere cum ipsis ejusdem fidei conscientiam: 3. eos Apostolicæ atque Evangelicæ doctrine studiosos esse: 4. eos afferre spem revocandæ fidei: 5. non esse Arianos, sive hæreticos. Quomodo ergo idem S. HILARIUS dixerit, ut in Fragm. cit. *hæretici omnes?* Numquid semetipsum compellavit hæreticum!

2^o. Fragm. cit. hæc formula, quam ibi Liberius fertur dixisse catholicam, vocatur ariana *perfidia*; ideoque in fragmentis iisdem, ubi refertur epist. Liberii ad Orientales, cit. n. 120. anathema infligitur Liberio ob subscriptionem hujus formulæ; item vocatur *apostata, prævaricator*: atqui formulam primam S. HILAR. Lib. de Syn. a n. 38. ad 63. ut catholicam exponit, laudatque.

Neque dicas: a S. HILARIO dici *perfidiam* ratione consilii et fraudis auctorum illius formulæ; non ratione sententiarum, quibus constat. Nam 1. auctores formulæ illius erant ad magnam partem Semiariani, quos ut perfidos nunquam habuit HILARIUS. 2. Si perfidiam intellexisset dato sensu, quomodo ob subscriptionem hujus formulæ, quæ ex mente ipsis HILARIUS habebat sensum catholicum, quæque in hoc sensu, ipsis HILARIUS testimonio, erat admissa a Liberio, huic poterat infligere anathema, eum vocare apostamat, prævaricatorem, quin HILARIUS in se HILARIUM has ipsas censuras tulisset? 3. Data responsio non est accommoda textui; HILARIUS enim *perfidiam* hic vocaret illud, quod Liberius fertur dixisse *catholicum*; hic enim est sensus naturalis et obvius: atqui Liberius formulam ratione sententiarum, quibus constat, dixisset *catholicam*; nam fraudes suas utique Liberio non patet fecerint Semiariani. Accedit, quod Fragm. cit. dicatur *perfidia*

descripta, conscripta, quæ in sensu communi rem, ut scripta jacet, designant.

122. II. LIBERIUS non subscrispsit formulæ secundæ. Ita nunc plerique catholici contra Blondellum Calvinicolum.

Prob. Nam 1º. huic formulæ subscrispsisse Liberium diserte negat SOZOMENUS, juxta n. 445.

2º. Si formulæ huic subscrispsisset Liberius, dubitare non possumus, quin, sicut Hosius remissus fuit in Hispaniam, quod subscrispsisset huic formulæ, sic quoque remissus Romanam fuisse Liberius, et multo magis, quod jam Constantius Liberii redditum promisisset Romanis; at Hosius anno 337. post subscriptionem jam remissus fuit; Liberius non nisi anno 358.

3º. S. HILARIUS L. de Syn. non modo frequenter dicit, ab Hosio receptam fuisse formulam secundam, sine ulla de Liberio mentione, sed etiam a n. 78. clare insinuat, solum ex iis, qui Arianî non erant, fuisse Hosium, qui illam formulam receperat, sive qui consenserat, ut non solum vox ὁμούσιος consubstantialis, sed etiam ὁμούσιος similis substantia omitteretur, quod primum in illa formulâ tentatum est ab Arianis; disserens enim cum Semiarianis, *Oro vos, inquit, ne quisquam alius ex his præter senem Osium, et ipsum illum nimium sui sepulcri amantem, reperiatur qui tacendum existimet de utroque.*

4º. Hinc Arianî solius auctoritatem Hosii objiciebat catholicis; nunquam Liberii Romani Pontificis, ut discimus ex S. Phæbadii contra Arianos opusculo; attamen illa Liberii majoris fuisse ponderis.

5º. S. EPIPHAN. similiter hær. 86. n. 14. affirmat, de Hosii lapsu mire triumphasse Arianos, quos tamen fraudis arguit: *Quo nomine Ecclesiam condemnare se posse, putarunt (Arianî) iis litteris, quas ab venerabili Episcopo Hosio per fraudem abstulerunt, in quibus dissimilis essentia legitur.* Si tanti triumphi materia erat consensus Hosii, forte fraudulenter extortus et ex parte fictitious; quos non cœcissent Arianî triumphos, si tantumdem dicere potuissent de Romano Pontifice? Tentarunt id quidem per calumniam, velut ex SOZOMENO vidimus n. 115., sed cuius paulo post ipsos pugnuit; ut colligitur ex eorum mox secuto silentio.

123. III. Neque subscrispsit LIBERIUS formulæ tertiae: imo huic omnium minime subscrispsisse dici potest.

Prob. Tertia formula Sirmiensis composita est anno 359., ut docet S. ATHANAS. L. de Synod., ubi eam refert n. 8. *Edita est catholica fides, præsenle Domino nostro piissimo, et victoriis excilio Imperatore Constantio Augusto, aeterno, venerando, sub Consulatu Flaviorum Eusebii et Hypatii clarissimorum, undecimo Calendas Junias; id est 22. Maii anni 359.* At Liberius jam anno precedente 358. Romam redierat, ut communis habet sententia Chronologorum cum BARONIO, PAGIO, TILLEMONTIO, PAPEBROCHIO nostro, et STILINGIO contra alios, qui in eo solum ab hac communis sententia differunt, quod redditum Liberii adhuc citius, scilicet anno 357., nullus vero post ann. 358. contigisse dicat; et ratio aliqua sententiae petitur ex L. 14. de Episcopis, quæ data legitur VIII. *Idus Decembris, Constantio nonum, et*

Juliano secundum Consulibus. i. e. anno 357. quæ data dicitur ad Felicem; ergo Liberius adhuc erat in exilio; nam redeunte Liberio, Felix Roma cessit continuo.

124. Dices 4º. Cum *Pagio et Valesio.* In conventu Sirmensi habitu anno 358. præsentibus Imperatore, et legatis Concilii Ancyranî, BASILIO Ancyrano, EUSTACHIO Sebasteno, et ELEUSIO Cyziceno composita fuit illa tercia fidei formula, quam recepit Liberius; ad quid enim alias ille conventus fuisse celebratus?

R. Bona pace tantorum virorum N. Supp. quod inter formulam Sirmensem secundam anni 357. et inter Sirmensem tertiam anni 359. ulla condita fuérit intermedia Sirmensis formula. Constat ex S. ATHANASIO L. de Syn. ubi de proposito referens omnes Arianorum formulas, post secundam Sirmensem n. 29. recitatam, mox eod. n. 29. pergit ad tertiam Sirmensem, eamque recitat et figit anno 359.; alia vero intermedia ipsi incognita fuit. Idem amplius evincitur ex S. HILARIO L. de Syn. Et vero si condita aliqua formula intermedia, quæ illa? Cur illam in forma non producunt adversarii?

Ad quæsitum R. Conventum Sirmensem habitum fuisse ad preces legatorum Concilii Ancyranî eod. ann. 358. habiti, in quo reprobata fuerat secunda Sirmensis formula. Agebant igitur Legati apud Constantium, ut ipsi precipui secunde impie Sirmensis formulæ auctores, Valens, Ursacius, Germinius, subscribere compellerentur anathematismis, contra illam Ancyrae compositis, qui erant numero 12., atque sic damnare impietatem apertam, quam ipsi protulerant. Hæc manifesta sunt ex S. HILARIO L. de Syn. n. 2., quem S. Præsul ad Episcopos Galliæ, qui formulam eamdem damnaverant, paulo post conscripsit.

125. Dices 2º. Cum aliis tertiae, et primæ formulæ patronis simul. Ex SOZOM. L. 4. c. 13. in conventu Sirmensi a Legatis proposita fuit quedam formulârū collectio, quæ continebat 1. formulam Sirmensem primam contra Photinum: 2. aliam editam in dedicatione Antiochensis Basilice contra Paulum Samosatenum, qua reprehenduntur *consubstantialitatis* defensores, velut sub hujus obtentu vocabulî propriam hæresin stabilire conantes. Atqui ex eodem SOZOM. ibid. huic collectioni subscrispsit Liberius; ergo revera subscrispsit formulæ Sirmensi primæ; vel alicui formulæ inter primam et secundam intermediae.

R. Permissò, illi conventu interfuisse Liberium, et alios a SOZOM. enumeratos, N. min. et vehementer metuo, ne plures adversarii hic, ubi SOZOM. agit de iis, qui in conventu illo ad subscribendum compulsi, Liberium Africæ Episcopum confundant cum Liberio Romano Pontifice; nam eos referens, qui subscriperunt, ait: *Effecerunt (Legati) ut Liberius, Athanasius, Alexander, Severianus, et Crescens (NB.) Africæ Episcopi ei formulæ (sed græce Ei, scilicet Libello, in quem omnia conjuncta fuisse immediate ante dixerat) consentirent. Consenserunt pariter Ursacius, Germinius et Valens, et quoiquot ex Orientalibus partibus aderant.* Quid vero cum Liberio gestum fuerit, speciatim postea docet, nimirum quod Legati a Liberio quoque confessionem suscepserint, sed qualem? adverte: *qua eos;*